

## 4. Informacións e correccións de erros

### 4.1. Informacións

#### Valedor do Pobo

#### **Acordo da Mesa do Parlamento de Galicia, do 24 de maio de 2021, polo que se modifica a relación de postos de traballo do Valedor do Pobo**

De conformidade co establecido no artigo 10 da Lei 6/1984, do 5 de xuño, do Valedor do Pobo, o persoal ao servizo do Valedor do Pobo depende orgánica, funcional e disciplinariamente da Valedora do Pobo e rexerase polas normas de réxime interior recollidas na súa disposición adicional e, con carácter supletorio, polo Estatuto de persoal do Parlamento de Galicia.



O cadro de persoal ou relación de postos de traballo, de acordo co dito artigo, será aprobado pola Mesa do Parlamento, por proposta da persoa titular da institución.

A relación de postos de traballo configúrase como o instrumento técnico a través do cal se leva a cabo a ordenación do persoal, de acordo coas necesidades dos servizos, precisando os requisitos para o desempeño de cada posto e comprendendo, segundo establece o artigo 19 do Estatuto de persoal do Parlamento de Galicia, a súa denominación, situación na estrutura orgánica, forma de provisión, grupo, corpo e escala, nivel, complemento específico e requisitos para o seu desempeño. A planificación dos recursos humanos nas administracións públicas é un instrumento necesario para contribuír á consecución da eficacia na prestación dos servizos e da eficiencia na utilización dos recursos económicos dispoñibles mediante a dimensión adecuada dos seus efectivos, a súa mellor distribución, formación, promoción profesional e mobilidade.

A institución da Valedora do Pobo precisa, para o eficaz cumprimento das súas funcións, proverse de persoas cunha serie de coñecementos, habilidades, aptitudes e actitudes necesarios para o desenvolvemento das funcións que teñen asignados eses postos. Para cumprir con esta finalidade é necesario adecuar a relación de postos de traballo, para sumar o compoñente obxectivo das tarefas (posto) co subxectivo (requisitos de desempeño do ocupante) e acadar unha eficaz e eficiente prestación dos servizos públicos.

A relación de postos de traballo debe ser un instrumento dinámico que responda ás necesidades reais da institución en cada momento e, por tanto, susceptible de ser modificada para adaptarse ás exixencias que lle impón o deber de prestar de forma eficiente o exercicio da defensa dos dereitos dos cidadáns.

A modificación da relación de postos de traballo ten como finalidade adecuar o perfil dos postos ás necesidades da organización, catalogándose os postos en función da súa denominación, clasificación orgánica, forma de provisión, grupo, corpo ou escala de adscrición, nivel de complemento específico e requisitos para o seu desempeño.

A prohibición de incrementos dos créditos dedicados a persoal (capítulo I do orzamento de gastos) foi unha constante nas leis orzamentarias a partir do ano 2010 no marco das políticas de axuste orzamentario. Non obstante, ese obrigado cumprimento da limitación orzamentaria, co fin de conter o gasto público, debe harmonizarse coa necesaria prestación eficiente dos servizos públicos mediante unha ordenación adecuada dos recursos humanos; criterios estes que deberán observarse nas modificacións das relación de postos de traballo co fin de asegurar a eficaz prestación dos servizos.

Faise necesaria unha evolución e adaptación ás novas exixencias, en especial cara á inminente implantación da sede electrónica, rexistro electrónico, arquivo electrónico e sistema de tramitación electrónica dos procedementos na institución, que comporta necesariamente a reordenación dos efectivos para unha asunción eficiente e eficaz dun novo sistema de traballo.

As funcións de uxier, no control do tránsito interno da institución, acompañamento de persoas, asistencia ou auxilio durante a celebración de reunións ou actos protocolarios, asistencia telefónica ao cidadán, reprografía, repartición e traslado de correspondencia e apoio no arquivo, biblioteca e



almacéns, entre outras funcións, víronse reducidas sensiblemente nestes últimos tempos coa posta en marcha de presentación e remisión, tanto de queixas como de expedientes administrativos de contratación ou os relativos á Comisión de Transparencia de Galicia, a través de medios electrónicos, e coa xeneralización do uso do correo electrónico e presentación a través da web da institución. Estas funcións veranse aínda máis reducidas coa posta en marcha do sistema electrónico de tramitación e a entrada en funcionamento da sede, rexistro e arquivo electrónicos.

A estas funcións, na actualidade, estaba dedicado o persoal que ocupa os dous postos de uxier da institución e o posto de condutor-ordenanza. Considérase que as funcións anteriormente descritas poden ser desenvolvidas por un posto de uxier e a persoa que ocupa o posto de condutor-ordenanza, sen que sexa necesario manter o segundo posto de uxier.

Por outra banda, o traballo esencialmente administrativo de apoio ao persoal encargado da tramitación dos expedientes viuse nestes últimos dous anos incrementado, tanto polo número de expedientes como de consultas e atención telefónica aos cidadáns que acoden a esta institución.

Por todo o anterior, propónse a modificación da denominación e nivel de complemento de destino da praza núm. 18 de uxier da RPT, para a realización das funcións de auxiliar de apoio ao persoal asesor que se lle asigne. O posto pasaría a denominarse Unidade de Apoio II.

Dado que os dous postos de uxier que figuran na vixente relación de postos de traballo cos números 18 e 19 están cubertos, e que a modificación proposta implica unha importante modificación do contido e funcións que desenvolverá a persoa que o ocupe, o procedemento para elixir entre os dous postos idénticos cal deles se propón modificar foi o de ofertar a ambos os funcionarios tal posibilidade, para modificar a do funcionario que estivese interesado; no caso de que ambos estivesen interesados, baremaríanse os méritos de cada un conforme os criterios establecidos no punto 6.6.2 do Acordo do 8 de xullo de 2019, da Mesa do Parlamento de Galicia, polo que se convocan probas selectivas para ingresar por promoción interna nunha praza do corpo administrativo e polo que se aproban as bases reguladoras do procedemento de selección. A dita baremación non foi necesaria dado que a persoa titular do posto núm. 18 estaba interesada en asumir as novas funcións e responsabilidades mentres que a persoa titular do posto núm. 19 non estaba interesada na modificación do seu posto de traballo.

Respecto da audiencia ao persoal, dado que na institución non está constituído un órgano de representación do persoal, a proposta de modificación foi comunicada a todo o persoal funcionario, como se fai habitualmente, e foi debatida en reunión mantida o día 3 de decembro de 2020, reunión na que o persoal manifestou a súa conformidade.

Tamén se informou as organizacións sindicais a través da Mesa de Negociación da Administración do Parlamento de Galicia. As organizacións sindicais máis representativas asinaron o correspondente acordo relativo á proposta.

As funcións do posto que se propón modificar son as mesmas que as que figuran no punto segundo do Acordo da Mesa do Parlamento de Galicia do 21 de xaneiro de 2020 (BOPG núm. 596, do 24 de xaneiro de 2020) para o posto de Unidade de Apoio (posto núm. 17), o que xustifica que ao posto que se propón modificar se lle asigne o mesmo complemento de destino (nivel 16).



Así mesmo, co fin de manter a coherencia na denominación dos postos, o posto núm. 17 , actual Unidade de Apoio, pasará a denominarse Unidade de Apoio I.

A asignación das mesmas funcións xustifica a modificación proposta, de xeito que o posto poida ser cuberto por persoal funcionario dos grupos D (auxiliar administrativo) ou E (subalerno), con complemento de destino de nivel 16 e conservando o complemento específico do seu posto.

Esta modificación da RPT responde, segundo se fundamenta, a necesidades de reorganización administrativa.

O incremento anual que supón de 843,92 euros —en tanto non está prevista no proxecto de orzamentos para o exercicio 2021— pode ser afrontado co crédito da vacante existente, cuxo proceso para a súa cobertura aínda está en fase de inicio.

Visto o informe proposta de modificación presentado pola persoa titular do Valedor do Pobo; vistos os informes dos Servizos Xurídicos e da Intervención do Parlamento de Galicia, a Mesa, conforme o disposto no artigo 10.2 da Lei 6/1984, do 5 de xuño, do Valedor do Pobo, adopta o seguinte acordo:

Primeiro. Modifícase a relación de postos de traballo do Valedor do Pobo nos termos seguintes:

Orde	Unidade orgánica	Denominación	Nivel	Complemento específico (C/ano)	Grupo	Corpo	Tipo de posto	Forma provisión	Observacións
18	Servizos Adm vos.	Unidade de Apoio II	16	16.639,42	D/E	Auxiliar/Subalerno	N	C	Persoal funcionario

2. Cámbiase a denominación do posto número 17, que actualmente se denomina Unidade de Apoio e pasa a denominarse Unidade de Apoio I.

3. Asígnanselle ao posto Unidade de Apoio II as funcións seguintes:

— A prestación de funcións de asistencia administrativa á Secretaría Xeral e á Coordinación da Institución da Valedora do Pobo.

— A asistencia e apoio administrativo na elaboración, seguimento e ordenación dos expedientes de queixas.

— O apoio administrativo na xestión e alimentación dos sistemas de tramitación de expedientes e bases de datos da Valedoría do Pobo.

— A colaboración na recompilación e ordenación de información e elaboración de documentación derivada da actividade da institución.

— A colaboración na alimentación e explotación das fontes documentais da institución.



---

— Traballos de edición e transcripción.

— Alimentación e consulta das bases de datos da institución.

— A actualización e consulta dos contidos da páxina web da Valedora do Pobo.

— Aquelas funcións propias da súa categoría profesional que lle sexan encomendadas polos superiores xerárquicos en atención ao grao de especificidade, dificultade técnica, responsabilidade ou demais condicións particulares dos postos que en cada caso ocupen, e que determinaron a súa configuración na relación de postos de traballo.

— Aquelas funcións que, sendo análogas ás anteriores ou tendo carácter instrumental para garantir o correcto desempeño das funcións da institución, lle sexan asignadas.

Segundo. Este acordo de modificación producirá efectos desde o día da súa publicación no *Boletín Oficial do Parlamento de Galicia*.

Santiago de Compostela, 26 de maio de 2021

Diego Calvo Pouso

Vicepresidente 1º

